



4. Maaji 2023

UPA2023/103

**Kommuunit oqaloqateqatigalugit inuit napparsimanermik pissuteqartumik suliffissarsiortut ikiorsiissutinik qinnuteqartut qanoq pitsaanerpaamik aalajangiinissap tungaanut aningaasartuutiminnik akissaqarnissaannut sullinneqarnissaannik qulakkeerinninnissamut Naalackersuisut peqquneqarnissaannik Inatsisartut aalajangiiffisissaattut siunnersuut.**

(Inatsisartuni ilaasortaq Doris J. Jensen, Siumut)

Pingaarutilimmik siunnersuuteqartoq Siumumiit qutsavigaarput.

Siumumiit nuannaarutigalugu oqaatigeriissavarput siunnersuut tamakkiisumik taperseratsigu, tunngavilersuutigineqartullu paasilluaratsigit tamakkiisumillu ilaleratsigu.

Piumasarinnngisamik suliffissaarussinaneq arlalinnik tunngaveqarsinnaasoq ilaatigut ajutoornermik kinguneqarsinnaasoq aamma nappaammik eqqugaanermik kinguneqarsinnaasoq Siumumiit imaannaangitsutut nalilerparput.

Taamatut nalaataqartoqartillugu nalaataqartumut imaannaaneq ajorpoq, ilaqutariinnut tamanut assigiinngitsorpassuartigut attuisartoq ajorluinnaraangamilu saaffissaaleqineq nalaanneqartarluni.

Siumumiit isumaqarpugut inunnik isumaginninnikkut sullissinerit ikiorsiisarnerillu tamarmik, naatsorsueriaatsit naleqassutsimik aallaaveqartut sakkugalugit, ingerlaavartumik nalilersorneqartariaqartut naleqqussartuarneqarlutillu.

Taamaaliornikkut nunatsinni sullinneqartunut tamanut sullissineq pitsaanerpaaq naligiinnerusorlu anguneqassammat, tamannalu ineriartortinneqassaaq

Namminersorlutik Oqartussat kommunillu suleqatigiinnerisigut. Isumaginninnikkut sullissineq imminut ikiornissamik aallaaveqartillugu ingerlanneqartassammat.

Siunnersuuteqartup angorusutaa piaarnerusumik kommune-t iliuseqarasuuartarnissaat oqaloqatigiinnikkut Naalackersuisut qulakkeertariaqaraat pissusissamisussaag.

Siumumiit oqarusuppugut taamatut nalaataqartoqaraangat piumassuserinnngisamik ajutoornikkut nappaammilluunniit eqqugaasoqartillugu, ullormiit ullormut aallartinneqartartussamik sinaakkutigut, Naalackersuisut qulakkeerinnissasut nalaataqartoqartillugu saaffiginnittoqarnerani piaartumik ikiorsiigasuartoqarnissaanik toqqissisimanartumik sinaakkusiissallutik. Ilaatigut ajoraluartumik nalaattarparput ikiuigasuartoqarsinnaaneq ajortoq sinaakkutigut qulakkeerneqarsimannginnerata kingunerisaanik. Taamatut nalaataqarneq takornartaavallaqaaq, naammattumik



ikiorsiigasuartannginnerup kingunerisarpaa ilaatigut allaat Danmarkimut nuuttoqartariaqartarnera.

Naggataatigullu kaammattuuteqarusuppugut, Siumumiit Pingaaruteqartutut oqaatigissallugu pissusissamisoorsoraarput sillimmat pigineqarnissaa, inuiaqatigiinni periarfissaqartuni ataasiakkaatut sillimmateqarsinnaaneq periarfissaammat atorluaqqunaqaaq. Sillimmateqarsinnaaneq periarfissatsialaammat assigiinngissutigut pisoqariataarsinnaaneranut annertuumik ikiuutaalluarsinnaammat. Sillimmasiisarnissaq periarfisatsialattut Siumumiit atorluarneqartarnissaa kaammattuutigerusupparput.

Taamatut oqaaseqarluta siunnersuut ataatsimiititaliamut susassaartumut ingerlateqqinneqarnissaa innersuussutigaarput.

Lars Poulsen, Siumut